


2001/99
20037
249



樂城集卷之一


宋眉山蘇轍子由著

詩五十二首

郭綸 綸本河西弓箭手屢戰有功不賞自黎州都監官滿貧不能歸權嘉州監稅

郭綸本蕃種騎鬪雄西戎流落初無罪因循遂龍鍾嘉州已經歲
見我涕無窮自言將家子少小學彎弓長遇西鄙亂走馬救邊烽
手挑丈八矛所往如投空平生事苦戰數與大寇逢昔在定川寨
賊來如羣蜂萬騎擁酋帥自謂白相公揮兵取其元縹糊腥血紅

明東吳顧天敘禮初全校



戰勝士氣振赴敵如旋風蚩蚩喪將不信勇且忠遙語相勸誘
一矢摧厥胸短兵接死地日落沙塵蒙馳歸不敢息馬口銜折鋒
誰知八尺軀脫命萬死中忽聞南蠻叛羽檄行怱怱將兵赴危難
瘴霧不辭衝行經賀州城寂寞無人蹤攀堞莽不見入據爲築壙
一旦賊兵下百計燒且攻三日不能陷救至遂得通崎嶇有成績
元帥多異同有功不見賞惟予落巴賓已矣誰復信言之氣恟恟
予不識郭綸聞此爲斂容一夫何足言竊恐悲羣雄此非介子推
安肯不計功郭綸未嘗敗用之可前鋒

初發嘉州

放舟沫江濱往意念荆楚擊鼓樹兩旗勢如遠征戍紛紛上船人
擄急不容語余生雖江陽未省至嘉樹巉巉九頂峯可愛不可住
飛舟過山足佛脚見江滸舟人盡斂容競欲揖其拇我頃已不見
烏牛在中渚移舟近山陰壁峭上無路云有古郭生璞此地苦箋
註區區辨蟲魚爾雅細分縷洗硯去殘墨遍水如黑霧至今江上
魚頂有遺墨處覽物悲古人嗟此空自苦余今方南行朝夕事鳴
榔至楚不復畱上馬千里去誰能居深山永與禽獸伍此事誰是
非行行重回顧

過宜賓見夷中亂山

江流日益深民語漸已變岸濶山盡平連峯遠非漢慘慘瘴氣青
薄薄寒日暖峯巒若崖石草木條幹短遙想彼居人狀類麕鹿竄
何時遂平定戍卒從此返

夜泊牛口

行過石壁盡夜泊牛口渚野老三四家寒燈照疎樹見我各無言
倚石但箕踞水寒雙脰長壞袴不蔽股日莫江上歸潛魚遠難捕
稻飯不滿盂飢臥冷徹曙安知城市歡守此田野趣祗應長凍飢
寒暑不能苦

戎州

江水通三峽州城控百蠻沙昏行旅倦邊靜禁軍閑漢虜更成市
羅紈靳不還投種揀精密換馬瘦孱顏兀兀頭垂髻團團耳帶環
夷聲不可會爭利苦間關

舟中聽琴

江流浩浩羣動息琴聲琅琅中夜鳴水深天闊音響遠仰視牛斗
皆從橫昔有至人愛奇曲學之三歲終無成一朝隨師過滄海畱
置絕島不復迎終年見怪心自感海水震掉魚龍驚翻回蕩滴有
遺韻琴意忽忽從此生師來迎笑問所得撫手無言心已明世人
囂囂好絲竹撞鐘擊鼓浪謂榮安知江琴韻超絕擺耳大笑不肯

聽

泊南井口期任遵聖

期君荒江濱未至望已極朔風吹烏裘隱隱沙上立愧余後期至
先到犯寒色既泊問所如歸去已無及繫舟重相邀雨冷塗路濕

江上早起

晨興孤舟上盥濯夜氣清整巾未息坐雙檣軋已鳴日出江霧散
江上山從橫區區茅舍翁曉出露氣腥收筒得大鯉愛惜不忍烹
持之易斗粟朝飢厭魚羹蕭蕭遠風起泛泛野鴈驚忽過百餘里
山水互變更逢舟問所如彼此不知名超超江湖間殊勝地上行
且游市井喧莫宿無人聲江上誠足樂無怪陶朱生

江上看山

朝看江上枯崖山憔悴荒榛赤如赭莫行百里一回頭落日孤雲
靄新畫前山更遠色更深誰知可愛信如今唯有巫山最穠秀依
然不負遠來心

山胡

山胡擁蒼髯兩耳白茸茸野樹啼終日黔山深幾重啄溪探細石
噪虎上孤峯被執應多恨筠籠僅不容

白鷗

白鷗形似鴿搖曳尾能長寂寞懷溪水低回愛稻梁田家比鷄鶩
野食薦杯觴肯信朱門裏徘徊占玉塘

屈原塔

在忠州

屈原遺宅秭歸山南賓古者巴子國山中遺塔知幾年過者遲疑
不能識浮圖高絕誰所爲原死豈復待汝力臨江慷慨心自明南
訪重華訟孤直世人不知徒悲傷強爲築土高岌岌

嚴顏碑

亦在忠州

古碑殘缺不可讀遠人愛惜未忍磨相傳昔者嚴太守刻石千歲
字已訛嚴顏平生吾不記獨憶城破節最高被擒不辱古亦有吾

愛善折張飛豪軍中生死何足怪乘勝使氣可若何斫頭徐死子
無怒我豈畏死如兒曹匹夫受戮或不避所重壯氣吞黃河臨危
閑暇有如此覽碑慷慨思橫戈

竹枝歌

忠州作

舟行千里不至楚忽聞竹枝皆楚語楚言啁哳安可分江中明月
多風露扁舟日落駐平沙茅屋竹籬三四家連春並汲各無語齊
唱竹枝如有嗟可憐楚人是悲訴歲樂年豐爾何苦釣魚長江江
水深耕田種麥畏狼虎俚人風俗非中原處子不嫁如等閑雙鬢
垂頂髮已白負水採薪長苦艱上山採薪多荆棘負水入溪波浪

黑天寒斫木手如龜水重還家足無力山深瘴暖霜露乾夜長無
衣猶苦寒平生有似麋與鹿一旦白髮已百年江上乘舟何處客
列肆喧譁占平磧遠來忽去不記州罷市歸船不相識去家千里
未能歸忽聽長歌皆慘悽空船獨宿無與語月滿長江歸路迷路
迷鄉思渺何極長怨歌聲苦淒急不知歌者樂與悲遠客乍聞皆
掩泣

望夫臺

在忠州南
數十里

江上孤峯石爲骨望夫不來空獨立去時江水拍山流去後江移
水成磧江移岸改安可知獨與高山化爲石山高身在心不移慰

爾行人遠行役

八陣磧

在夔
州

漲江吹八陣江落陣如故我來苦寒後平沙如匹素乘高望遺迹
磊磊六十四遙指如布碁就視不知處世稱諸葛公用眾有法度
區區落褒斜軍旅無闊步中原竟不到置陣狹無所茫茫平沙中
積石排隊伍獨使後世人知我非莽鹵奈何長蛇形千古竟不悟
惟餘桓元子久視不能去

灩澦堆

或云上
有古碑

江中石屏灩澦堆鼉靈夏禹不能摧深根百丈無敢近落日紛紛

續城集卷一
六
鳧鴈來何人磊落不畏死爲我赤脚登崔嵬上有古碑刻奇篆當使盡讀磨蒼苔此碑若見必有怪恐至絕頂遭風雷

入峽

舟行瞿唐口兩耳風鳴號渺然長江水千里投一瓢峽門石爲戶鬱怒水力驕扁舟落中流浩如一葉飄呼吸信奔浪不復由長篙捩柁破瀆旋畏與亂石遭兩山蹙相值望之不容舫漸近乃可入白鹽最雄高草木皆倒生哀叫悲玄猿白雲繚長袖零露如飛毛緬懷涪水年慘蹙病有堯禹益決岷水屢與山鬼麀摧岡轉大石破地疏洪濤巉巉當道山斬截肩尾銷峭壁下無趾連峯斷脩腰破處不生草上不挂鳥巢水怪不盡戮下有龍與鼇遼哉千萬年禹死遺迹牢豈必見河洛開峽斯已勞

巫山廟

山中廟堂古神女楚巫婆娑奏歌舞空山日落悲風吹舉手睢盱道神語神仙潔清非世人瓦盎傾醪薦麩脯子知神君竟何自西方真人古王母飄然乘風遊九州揭渡西海薄中土白雲爲車駕蒼虬驂乘湘君宓妃御天孫織綃素非素衣裳飄飄薄烟霧泊然冲虛眇無營朝飡屑玉嚙瓊乳下視人世安可據超江乘山去無所巫山之下江流清偶然愛之不能去湍崖激作相喧豨白花翻

翻龍正怒堯使大禹導九州石隕山隊幾折股山前恐懼久無措
稽首山下苦求助丹書玉笈世莫窺指示文字相爾汝擘山洩江
幸無苦庚辰虞余實相禹功成事定世莫知空山俄頃千萬古廟
中擊鼓吹長簫採蘭爲殮蕙爲肴玉缶薦芰香飄蕭龍勺取酒注
白茅神來享之風飄飄荒山長江何所有豈有瓊玉薦沈寥神君
聰明無我責爲我驅獸攘龍蛟乘船入楚沔巴蜀瀆旋深惡秋水
高歸來無恙無以報山上麥熟可作醪神君尊貴豈待我再拜長
跪神所勞

巫山廟烏

巫廟真人古列仙高心獨愛玉爐烟飢烏巧會行人意來去紛紛
噪客船

昭君村

峽女王嬙繼屈須入宮曾不愧秦姝一朝遠逐呼韓去遙憶江頭
捕鯉魚江上大魚安敢釣轉施橫江筋力小深邊積雪厚埋牛兩
處辛勤何處好去家離俗慕榮華富貴終身獨可嗟不及故鄉山
上女夜從東舍嫁西家

三遊洞

洞前危逕不容足洞中明曠坐百人蒼崖碑兀起成柱亂石散列

如驚麋清溪百丈下無路水滿沙土如魚鱗夜深明月出山頂下
照洞口纔及唇沉沉深黑若大屋野老篝火青如燐平明欲出迷
上下洞氣飄亂爲橫雲深山大澤亦有是野鳥鳴噪孤熊蹲三人
一去無復見至今冠蓋長滿門

寄題清溪寺

在硤州鬼
谷子故居

清溪鬼谷子雄辯傾六國視世無足言自閉長默默蘇張何爲者
欲竊長短術學成果無賴遂爲世所惑顛倒賣諸侯傾轉莫可執
後世何不明疑我不汝及誰知居深山玩世可終日君觀二弟子
死處竟莫得客齊自披裂投魏求寄食悠悠清溪中石亂流水急
溪魚爲朝食老死得安穴居亂獨無言其辯吾不測

息壤

在荆南
南門外

江上寒沙薄如席一夕墳起成高邛江流傾轉力不勝左齧右吐
非自由南郡城南獨何者平地生長殊不休當中屋背不盈尺深
入百丈皆石樓古人不知下有怪發破不掩水漲浮傳言夏鯨塞
涿水上帝愛此無敢偷竊持大畚負長鑄刺取不已帝使流禹知
水怒非塞止網捕百怪雜蜃鰕掘塚入土不計丈投擲填壓聲鳴
啾一時既定憂後世恐此竊出壞九州神人已死無復制故以此
土封其頭發之輒滿不可旣意使靈物長幽囚前年大旱千里赤

取土盈掬雨不收誰言咫尺舊黃壤中有千歲龍與虬高山萬仞
猶可削嗟此何獨生如流天長地遠莽無極雖有缺壞誰能調我
疑天意固有在患世多事窮鑄鏤埏陶鼓濤地力困久不自補無
爲憂世無女媧空白石磊磊滿地如浮漚耕田鑿井自無已息壤
無幾安能酬

荆門惠泉

泉源何從來山下長溪發油然本無營誰使自激冽茫茫九地底
大水浮一葉使水皆爲泉地已不勝洩應是眾水中獨不容至潔
涓涓自傾瀉奕奕見清澈石泓淨無塵中有三尺雪下爲百丈溪
冷不受魚鼈脫衣浣中流解我雙足熱樂哉泉上翁大旱不知渴

答荆門張都官維見和惠泉

荒涼荆門西泉水誰爲洩發源雖甚微來意不可折平鋪清地滿
皎皎自明澈甘涼最宜茶羊炙可用雪炎風五月交中夜吐明月
太守燕已遠青嶂空嶢嶢泉上白髮翁來飲杯饌闕酌水自獻酬
箕踞無禮節區區游泉人常值午日烈回首憂重城賞玩安能徹
荆陽早發

春氣入楚澤原上草猶枯北風吹栗林梅蘂颯已無我行亦何事
驅馬無疾徐楚人信稀少田畝任蕪蕪空有道路人擾擾不畱車

悲傷彼何賴歎息此亦愚今我何爲爾豈亦愚者徒行行楚山曉
霜露滿陂湖

襄陽古樂府二首

野鷹來

野鷹來雄雉走蒼茫荒榛下毳毼大如斗鷹來蕭蕭風雨寒壯士
臺中一揮肘臺高百尺臨平川山中放火秋草乾雉肥兔飽忝不
去野鷹飛下風蕭然嗟哉呼鷹臺人去臺已圯高臺不可見况復
呼鷹子長歌野鷹來當年落誰耳父生已不武子立又不強北兵
果南下擾擾如驅羊鷹來野雉何暇走束縛籠中安得翔可憐野
雉亦有爪兩手掉鷹猶可傷

襄陽樂

誰言襄陽苦歌者樂襄陽太守劉公子千年未可忘劉公一去歲
時改惟有州南漢水長漢水南流峴山碧種稻耕田泥沒尺里人
種麥滿高原長使越人耕大澤澤中多水原上乾越人爲種楚人
食火耕水耨古常然漢水魚多去滿船長有行人知此樂來買槎
頭縮項鱸

雙鳧觀

在葉縣

王喬西飛朝洛陽飄飄千里雙鳧翔鳧飛遭網不能去惟有空屨

鳧已亡誰知野鳥不能化豈必雙履能飛揚鳧神履怪當有在搔
首野廟春風長

懷龜池寄子瞻兄

相攜話別鄭原上共道長途怕雪泥歸騎還尋大梁陌行人已渡

古嶠西曾為縣吏民知否轍嘗為此縣簿未赴而中第舊宿僧房壁共題轍昔與子

瞻應舉過宿縣中寺舍遙想獨遊佳味少無言騅馬但鳴嘶

辛丑除日寄子瞻

一歲不復居一日安足惜人心畏增年對酒語終夕夜長書室幽

燈燭明照席盤殮雜梁楚羊炙錯魚腊庖人饌雞兔家味宛如昔

有懷岐山下展轉不能釋念同去間里此節三已失初來寄荆渚

魚鴈賤宜客楚人重歲時爆竹鳴磔磔新春始涉五田凍未生麥

相攜歷唐許花柳漸牙折居梁不耐貧投杞避糠覈城南庠齋靜

終歲守墳籍酒酸未嘗飲牛美每共炙謂言從明年此會可懸射

同為洛中吏相去不盈尺濁醪幸分季新筍可餉伯嶢嶢嵩山美

漾漾洛水碧官閑得相從春野玩朝日安知書閣下羣子並遭馘

偶成一朝榮遂使千里隔何年相會歡逢節勿輕擲

次韻子瞻減降諸縣囚徒事畢登覽

山川足清曠闔闔巧拘囚安得熾阿御固為穆滿遊遙知因渙汗

遠出散幽憂原隰繁分繡村墟盡小侯春深秦樹綠野闊渭河流
四顧神蕭瑟前探意漲浮勝觀殊未已往足謂能收下坂如浮舸
登崖劇上樓強行腰偃僕困坐氣噓咻鳥語林巒靜花明澗谷幽
濯溪驚野老伐路駭他州中散探深去文淵到處畱聽琴峯下寺
弄石水中洲溪冷泉冰脚山高霧遶頭石潭清照骨瀑水濺成鈎
廟鳴鐘磬神官秉鉞劉養生聞帝女服氣絕彭讎故宅猶傳尹
先師不喜邛居人那識道過客謾停騶巖谷誠深絕神仙信有不
雲居無几杖霞珮棄鐙鏤豹隱連山霧龍潛百尺湫門開誰與叩
桃熟浪傳偷紺髮河無比方瞳凜不俾會須林下見乞取壽年修

拔去和雞犬相隨若旆旒乘風遺騶裊長嘯賤笙篴從騎衣皆羽
前驅鬣盡蚪安能牽兩足翫得快雙眸自昔辭鄉樹南行上楚舟
萬江窮地脈三峽東天溝雲暗鄧都晚波吹木樨秋尋溪緣窈窕
入洞聽颼颼空寺收黃粟荒祠畫伏彪登臨雖永日行邁肯停輟
蓄縮今何事攀躋昔已悠魏京饒士女春服聚蜉蝣雷動車爭陌
花搖樹繫鞦遊人紛蕩漾野鳥自嚶呦平日曾經洛閑居願卜緱
空言眞比夢久渴漸成愁早退嘗相約辭囂痛自摟愛山心刦刦
從宦興油油海宇都無礙山林盡可投願爲雲上鶴莫作盎中魚
適性行隨足謀生富給喉今遊雖不與後會豈無由畫出同穿履

宵眠共覆裘弟兄真欲爾朋好定誰儔試寫長篇調何人肯見酬

次韻子瞻太白山下早行題崇壽院

山下晨光晚林梢露滴昇峰頭斜見月野市早明燈樹暗猶藏鵲
堂開已饌僧據鞍應夢我聯騎昔嘗會

次韻子瞻延生觀後山上小堂

謝公遊意未能厭踏盡登山屐齒尖古殿神仙深杳杳香爐烟翠
起纖纖巖花寂歷飄瓊片庭檜蕭疎漏玉蟾帝子莫歸人不見微

風細雨自開簾

唐玉貞公主
修道於此山

次韻子瞻題仙遊潭中興寺

潭邊沙水不成泥潭上孤禽挂嶮啼繚繞飛橋能試客蒙茸草蔓

巧藏溪雲為絳帳馬融室石作屏風玉女閨仙果知君今未足臨

潭脚戰怕長梯

石鼻城

千山欲盡垂為鼻百戰皆空但有城虎闖穴中秦地恐龍飛渭上

漢江傾雍人未有章邯怨魏將猶存仲達精脾睨陵遲春草滿白

羊無數向風鳴

礧溪石

呂公年已莫擇主渭河邊跪餌畱雙膝臨溪不計年神專能陷石

續坡集卷一
心大豈營鱸不到磻溪上安知自守堅

郿塢

董公平昔甚縱橫晚歲藏金欲避兵當日英雄智相似燕南趙北亦爲京

樓觀

老聃厭世入流沙飄蕩如雲不可遮弟子憐師將去國關門望氣載還家高臺尙有傳經處畫壁空畱駕犢車一授遺書無復老不

知何苦服胡麻

此觀尹喜舊宅神仙傳言尹喜於流沙之西服巨勝實

次韻子瞻秋雪見寄一首

秋氣蕭騷仍見雪客愁繚繞動繁心幽吟北戶窗聲細歸夢函關馬迹深疎樹飛花輕藪藪衰荷畱柄亂簪簪遙聞詩酒皆推勝社客何人近納睪

平時出處常聯袂文翰叨陪舊服膺自信老兄憐弱弟豈關天下少良朋何時杯酒看浮白清夜看蔬粗滿登離思隔年詩不盡秦梁雖遠速須膺

次韻子瞻聞不赴商幕三首

怪我辭官免入商才疎深畏泰周行學從社稷非源本近讀詩書識短長東舍久居如舊宅春蔬新種似吾鄉閉門已學龜頭縮避

謗仍兼雉尾藏

雉藏不能盡尾
鄉人以爲諺

南商西洛曾虛署長吏居民怪不來
妄語自知當見棄遠人未信
本非才厭從貧李嘲東閣懶學諛
張緩兩腮知有四翁遺跡在山
中豈信少人哉

頃動箎鳴只自知憂輕責少幸官卑
聲名謾作耳中瑣科第空收
領底髭西鄙猖狂猶將將中朝閑暇
自師師近成新論無人語仰
羨飛鴻兩翅差

次韻子瞻病中大雪

吾兄筆鋒雄詩俊不可和雪中思清絕
韻惡愈難奈殷勤賦黃竹
自勸飲白墮言隨飛花落意與長風簸
餘力遠見撩千里寄嵯嶮
嗟予學久廢有類轉空磨研磨久無得
安可待充貨空記乘峽船
行意被摧判溟濛覆洲渚冷冽光照坐
我唱君實酬馳騁不遑臥
譬如逐獸盧豈覺山徑坳酒肴助喧熱
筆硯盡霑浣詩詞禁推類
令肅安敢破亦有同行人牽挽赴程課
爾來隔秦魏渴望等飢餓
徒然遇佳雪有酒誰與賀

次韻子瞻記歲莫鄉俗三首

餽歲

周公制鄉禮無有相通佐鼎肉送子
思烝豚出陽貨交親隨高低

豈問小與大自從此禮衰伏臘有飢臥鄉人慕古俗酬酢等四坐
東鄰遺西舍迭出如蟻磨寧我不飲食無爾相咎過相從慶新春
顏色買愉和

別歲

富貴日月速貧賤覺歲遲遲速不須問俱作不可追親舊且酣飲
送爾天北涯歲歲雖無情從我歷四時酌爾一杯酒畱我壯且肥
長作今歲歡勿起異日悲掉頭不肯顧曾莫與我辭酒闌氣方橫
豈信從爾衰

守歲

於菟絕繩去顧兔追龍蛇

是歲壬寅

奔走十二蟲羅網不及遮嗟我地

上人豈復奈爾何未去不自閑將去乃諠譁天上驅獸官爲君肯
停槌魯陽揮長戈日車果再斜釃酒勸爾醉期爾蹶蹉跎偕醉遣
爾去壽考自足誇

記歲首鄉俗寄子瞻二首

踏青

江上冰消岸草青三三五五踏青行浮橋沒水不勝重野店壓槽
無復清松下寒花初破萼谷中幽鳥漸嚶鳴洞門泉脈龍睛動觀
裏丹墀鳴舌生山下餅罌霑稚孺峰頭鼓樂聚簪纓縞裙紅袂臨

江影青蓋驂騑踏石聲曉去爭先心蕩漾莫歸跨後醉從橫最憐
人散西軒靜曖曖斜陽著樹明

蠶市

枯桑舒牙葉漸青新蠶可浴日晴明前年器用隨手敗今冬衣着
及春營傾困計口賣餘粟買箔還家待種生不惟箱篋供婦女亦
有鉏鋤資男耕空巷無人鬪客洽六親相見爭邀迎酒肴勸屬坊
市滿鼓笛繁亂倡優獍蠶叢在時已如此古人雖沒誰敢更異方
不見古風俗但向陌上聞吹笙

子瞻寄示歧陽十五碑

堂上歧陽碑吾兄所與我吾兄自善書所取無不可歐陽弱而立
商隱瘦且橢小篆妙詰曲波字美婀娜譚藩居顏前何類學顏頗
魏華自磨淬峻秀不包裹九成刻賢俊磊落雜么麼英公與襄鄂
戈戟聞自荷何年學操筆終歲惟箭筈書成亦可愛藝業嗟獨夥
余雖謬學文書字每慵墮車前駕騏驥車後繫羸跛逾年學舉足
漸亦行駮駮古人有遺迹筭短不及鑠願從兄發之洗硯處兄左

樂城集之一 終

樂城集卷之二

宋眉山蘇轍子由著

明東吳王執禮子敬全校
顧天敘禮初

詩六十九首

畫文殊普賢

誰人畫此二菩薩跌坐花心乘象狻弟子先後執盃老僧槎牙
森比肩山林脩道幾世劫顏貌偉麗如開蓮重崖宛轉帶林樹野
水荒蕩浮雲天峨眉高處不可上下有絕澗錮九泉朝陽未出白
霧起有光升天如月圓靈仙居中粗可識有類白兔依清蹊遊人

禮拜千萬萬迤邐漸遠如飛烟五臺不到想亦爾今之畫圖誰所
傳吾兄子瞻苦好異敗繪破紙收明鮮自從西行止得此試與記
錄代一觀

聞子瞻重遊南山

終南重到已春回山木綠崖綠似苔谷鳥鳴呼嘲獨往野人笑語
記曾來定邀道士彈鳴鹿誰與溪堂共酒杯應有新詩還寄我與

君和取當遊陪

彈鳴鹿飲溪堂皆
前遊終南時事

子瞻見許驪山澄泥硯

長安新硯石同堅不待書求遂許頒豈必餽人勝近世強推銅雀

沒驪山寒煤舒卷開雲葉清露露流發涕潛早與封題寄書案報
君湘竹筆身斑

寒食前一日寄子瞻

寒食明朝一百五誰家冉冉向厨烟桃花開盡葉初綠燕子飛來
體自便愛客漸能陪痛飲讀書無息懶開編秦川雪盡南山出思
共肩輿看麥田

大人久廢彈琴比借人雷琴以記舊曲十得三四率爾拜呈

久厭凡桐不復彈偶然尋繹尚能存倉庚鳴樹思前歲春水生波
滿舊痕泉落空巖虛谷應珮敲清殿百官寒終宵竊聽不能學庭

樹無風月滿軒

聞子瞻習射

舊讀兵書氣已振近傳能射喜征戩手隨樂節寧論中箭作鳴聲
不害文力薄僅能勝五斗才高應自敵三軍良家六郡傳真法馬
上今誰最出羣

種菜

久種春蔬早不生園中汲水亂瓶罌菘葵經火未出土僮僕何朝
飽食羹強有人功趨節令悵無甘雨困耘耕家居閑暇厭長日欲
看年華上菜莖

次韻子瞻題薛周逸老亭

飛鳥不知穴山鹿不知流薛子善飲酒口如汲水虬吾觀腸胃間
何異族黨州人滿地已盡一介不可留謂子試飲水一酌不再求
謂子飲醇酒百醕豈待酬酒可水不可其說亦已悠以我視夫子
胸腹百丈幽譬如田中人視彼公與侯未省破顏飲何況裸露頭
鴟夷謂大瓠皆飽安用浮多少苟自適豈害爲朋遊

次韻子瞻題長安王氏中隱堂五首

秦中勝岷蜀故國不須歸甲第春風滿巴山晝夢非竹深啼鳥亂
花落晚蜂飛我欲西還去敲門慎勿違

其二

唐朝卿相宅此外更應無請看庭前樹會攀屋裏姝流傳漸失實
遺老不禁徂試問歸登物林間翠石孤

或云此即歸登宅

其三

愛君高堂上有似蜀江墀墻外終南近簷西太白偏晚梅晴自媚
老竹暗相遷未到遙聞說吾廬安得然

其四

官去空畱鶴山浮不見鰲竹林迎日淨槐木擁亭高烏噪知人至
蟬鳴覺口勞誰能飲堂上解帶不穿袍

其五

君看原上墓墳盡但餘碑誰見生前貴塵生帶下龜高堂幸有酒
一飲豈論貲勉強行樂耳古人良可悲

和子瞻鳳翔八觀八首

石鼓

岐山之陽石為鼓叩之不鳴懸無虞以為無用百無直以為有用
萬物祖置身無用有用間自託周宣誰敢侮宣王沒後墳壠平秦
野蒼茫不知處周人舊物惟存山文武遺民盡囚虜鼎鍾無在鑄
戈戟宮殿已倒生禾黍厲宣子孫竄四方昭穆錯亂不存譜時有

過客悲先王綢繆牖戶徹桑土思宣不見幸鼓存由鼓求宣近為
愈彼皆有用世所好天地能生不能生君看項籍猛如狼身死未
冷割為脯馬童楊喜豈不仁待汝封侯非怨汝何況外物固已輕
毛擒翡翠尾執塵惟有蒼石於此時獨以無用不見數形骸偃蹇
任苔蘚文字被剝困風雨遭亂既以無用全有用還為太平取古
人不見見遺物如見方召與甫文非科斗可窮詰簡編不載無
訓詁字形漫汗隨石缺蒼蛇生角龍折股亦如老人遭暴橫顛下
髭禿口齒齷形雖不具意可知有云楊柳貫魴鱖魴鱖豈厭居溪
谷自投網罟入君俎柳條柔弱長百尺挽之不斷細如縷以柳貫
魚魚不傷貫不傷魚魚樂死登之廟中鬼神格錫女豐年多黍稌
宣王用兵征四國北摧犬戎南服楚將帥用命士卒驩死生不顧
闕虢虎問之何術能使然撫之如子敬如父弱柳貫魚魚弗違仁
人在上民不怒請看石鼓非徒然長笑太山刻秦語

咀楚文 咀當作詛

詛楚楚如桀詛秦秦則紂桀罪使信然紂語安足受牲肥酒醪潔
夸誕鬼不祐鬼非東諸侯豈信辯士口碑埋新年下意繞章華走
得楚不付孫但為劉季取吾聞秦穆公與晉實甥舅盟鄭絕晉歡
結楚將自救 事見呂相絕秦 使秦詛楚人晉亦議其後諸侯迭相詛禍福

果誰有世人不知道好古無可否何當投涇流渾濁蓋鄙醜

王維吳道子畫

在普門及開元寺

吾觀天地間萬事同一理扁也工斲輪乃知讀文字我非畫中師
偶亦識畫旨勇怯不必同要以各善耳壯馬脫銜放平陸步驟風
雨百夫靡美人婉婉守閑獨不出庭戶修容止女能嫣然笑傾國
馬能一蹶致千里優柔自好勇自強各自勝絕無彼此誰言王摩
詰乃過吳道子試謂道子來置女所挾從軟美道子掉頭不肯應
剛傑我已足自恃雄奔不失馳精妙實無比老僧寂滅生慮微侍
女閑絜非復婢丁寧勿相違幸使二子齒二子遺迹今豈多岐陽
可貴能獨備但使古壁常堅完塵土雖積光豔長不毀

楊惠之惣維摩像

在天桂寺

金粟如來瘦如腊坐上文殊秋月圓法門論極兩相可言語不復
相通傳主人養心遺四體瘦不爲病肌非妍誰人好道塑遺像鮎
皮束骨筋扶咽兀然隱凡心已滅形如病鶴竦兩肩骨節支離體
疎緩兩目視物猶爛然長嗟靈運不知道強翦美須插兩顴彼人
視身若枯木割去右臂非所患何況塑畫已身外豈必奪爾庸自
全真人遺意世莫識時有遊僧施鉢錢

東湖

不到東湖上但聞東湖吟詩詞已清絕佳境亦可尋蜿蜒蒼石蟠
蟠拏據湖心倒腹吐流水奔注爲重深清風蕩微波渺渺平無音
有鼈行在沙有魚躍在潭鼈圓如新荷魚細如蠹蟬梧桐生兩涯
蕭蕭自成林孫枝復生孫已中瑟與琴秋蟲噪蜩蚱春鳥鳴鳩鷯
有客來無時濯足蔭清陰自忘府中官取酒石上斟醉倒臥石上
野蟲上其襟醒來不知莫湖月翻黃金油然上馬去縱意不自箴
作詩招路人行樂宜及今人生不滿百一瞬何所任路人掉頭笑
去馬何駸駸子有不肖弟有冠未嘗簪願身化爲線使子爲之鍼
子欲烹鯉魚爲子漚釜鷺子欲枕山石爲子求布衾異鄉雖云樂
不如反故岑瘠田可鑿耕桑柘可織紝東有軒轅泉隱隱如牛潄
西有管輅宅尙存青石礎彭女留膝踝禮拜意已欽慈母抱眾子
亂石寒蕭森朝往莫可還此豈不足臨慎勿語他人此意子獨諶

眞興寺閣

秦川不爲廣南山不爲高峩峩眞興閣傑立陵風颺危檻俯翔鳥
跳簷落飛猱上有傲世人身衣白鶴毛下視市井喧奔走何嗷嗷
蕭然倚楹嘯遺響入雲霄清風吹其裾冉冉不可操不知何所爲
豈卽非盧敖遊目萬里間遠山如伏羔遺語謝世俗釣魚當釣鼈

李氏園

李氏正園也俗謂皇后園蓋茂正謂其妻也

有客騎白駒揚鞭入青草悠悠無遠近但擇林亭好蕭條北城下
園號李家媪繫馬古車門隨意無洒掃鳴禽驚上屋飛蝶紛入抱
竹林淨如濯流水清可澡閑花不着行香梨獨依島松枝貫今昔
林影變昏早草木皆蒼顏亭宇已新造臨風置酒樽庭下取栗棗
今人強歡笑古人已枯槁欲求百年事不見白鬚老秦中古云樂
文武在豐鎬置囿通樵蘇養獸讓麇麋池魚躍金碧白鳥飛紵縞
牛羊感仁恕行葦亦自保當年歌靈臺後世詠魚藻古詩宛猶在
遺處不可考悲哉李氏末王霸出奴阜城中開芳園城外羅戰堡
繫鼓鳴巨鐘百姓皆懷惱及夫聖人出戰國卷秋潦園田賦貧民

耕破園前道高原種菽粟陂澤滿粳稻春耕雜壺漿秋賦輸秸藁

當年王家孫自庇無尺椽空餘百歲木妄為天巫禱遊人足譏罵
百世遭舌討老翁不願見垂涕祝榘榘持用戒滿盈飲酒無醉倒

秦穆公墓 在橐泉上

泉上秦伯墳下埋三良士三良百夫特豈為無益死當年不幸見
迫脇詩人尙記臨穴惴豈如田橫海中客中原皆漢無報所秦國
吞西周康公穆公子盡力事康公穆公不為負豈必殺身從之遊
夫子乃以侯嬴所為疑三子王澤既未竭君子不為詭三良狗秦
穆要自不得已

聞子瞻將如終南太平宮谿堂讀書

爲吏豈厭事厭事日墮媮著書雖不急實與百世謀問吏所事何
過客及繫囚客實虛攬人囚有不自由辦之何益增不辦亦足憂
嗟此誰不能脫去使自收幽幽南山麓下有溪水流溪上亦有堂
其水可濯涑終日不見人惟有山鹿呦是時夏之初溪冷如孟秋
山樵黃笠展林筍紫角抽朝取筍爲羹莫以樵爲羞溪魚鯉與魴
山鳥鶯與鳩食之飽且平偃仰自佚休試探篋中書把卷揖前脩
恍如反故鄉親朋自相求蔚如甕中糟久熟待一篋爲文若江河
豈復有刻鏤尙何憶我爲欲與我同遊我雖不能往寄詩以解愁

次韻子瞻麻田青峰寺下院翠麓亭

走馬紅塵合開懷野寺存南山抱村轉渭水帶沙渾亭峻朱欄繞
堂虛白佛尊煩襟喜脩竹勸馬樂芳蓀白氎柔隨手清泉滿照盆
塵顏洗濯淨髀肉再三捫饋食青蔬軟流匙細粟翻老僧勿施敬
對客說山門

次韻子瞻宿南山蟠龍寺

谷中夜行不見月上下不辨山與谷前呼後應行相從山頭誰家
有遺竹楚楚深徑馬蹄響落落稀星著疎木行投野寺僧已眠叩
門無人狗出縮號呼從者久嗔罵老僧下牀揉兩目問知官吏冒

夜來掃牀延客臥華屋釜中無羹飢實盡愧客滿盞惟脫粟客來
已遠睡忘覺僧起開堂勸晨粥自嗟奔走閑僧閑偶然來過何年
復留詩滿壁符重遊但恐塵埃難再讀

賦園中所有十首

時在京師

萱草朝始開呀然黃鵠觜仰吸日出光口中爛如綺纖纖吐須鬣
冉冉隨風哆朝陽未上軒粲粲幽閑女美女生山谷不解歌與舞
君看野草花可以解憂悴

其二

寒地竹不生雖生常若病斲根種幽砌開葉何已猛嬋娟冰雪姿

散亂風日影繁華見孤淡一箇敵千頃令人憶江上森聳綠崖勁
無風籟自飄策策鳴荒迳

其三

蘆生井欄上蕭騷大如竹移來種堂下何爾短局促莖青甲未解
枯葉已可束蘆根愛溪水餘潤長鮮綠強移性不遂灌水惱僮僕
晡日下西山汲者汗盈掬

其四

堂後病石榴及時亦開花身病花不齊火候漸已差芳心竟未已
新萼綴枯槎誰言石榴病乃久占年華鄰家花最盛早發豈容遮

殘紅已零落婀娜子如瓜

其五

蒲桃不禁冬屈盤似無氣春來乘盛陽覆架青綾被龍髯亂無數
馬乳垂至地初如早梅酸晚作醲酪味誰能釀爲酒爲爾架前醉
滿斗不與人涼州幾時致

其六

室幽來客稀塵土積不掃鄰翁笑我拙教我種藁草經霜斫爲簞
不讓秋竹好始生如一毛張王忽侵道鋤耨禁芟斲愛惜待枯槁
有用皆勿輕吾師灌園老

其七

吾兄客關中果羸施吾宇兄雖未得還我豈如婦女叻叻感微物
滄泗若零雨但愛果羸莖屈曲上牆堵朝見緣牆頭莫已過牆去
物生隨年華還日何足數

其八

牽牛非佳花走蔓入荒榛開花荒榛上不見細蔓身誰翦薄素紗
浸之青藍盆水淺浸不盡下餘一寸銀嗟爾脆弱草豈能凌霜晨
物性有稟受安問秋與春

其九

南園地性惡雙栢不得長蓬麻春始生今已滿一丈栢主嗟幾年
失意自悽愴有子壓枝低已老非少壯尤栢栢已寃尤地亦恐妾
兩旣無所尤高枝幾時放

其十

葵花開已闌結子壓枝重長條困風雨倒臥枕邱壟憶初始放花
岌岌旌節聳得時能幾時狼籍成荒元浮根不任雪採剝收遺種
未忍焚枯莖積疊牆角擁

和子瞻記夢二首

兄從南山來夢我南山下探懷出詩卷卷盈君把詩詞古人似
弟則吾弟也相與千里隔安得千里馬攜手上南山不知今乃夜
晨鷄隔牆唱欹枕窗月亞百語記一詞秋菊悲蛩吒此語鮑謝流
平日我不暇我本無此詩嗟此誰所借

蟋蟀感秋氣夜吟抱菊根霜降菊叢折寸根安可存耿耿荒苗下
唧唧空自論不敢學蝴蝶菊盡兩翅翻蟲凍不絕口菊死不絕芬
志士豈棄友列女無兩婚

次韻子瞻題岐山周公廟

周人尙記有周公禾黍離離下有宮破豆烝豚非以報野巫長跪
若爲通山圍棟宇泉流近廟後有德潤泉世亂則竭鳳去梧桐落葉濛有客賦

詩題屋壁二南猶自有遺風

次韻子瞻題扶風道中天花寺小亭

客車來不息轍迹自成溝
莫怪慵登寺猶疑賞舉頭
獨遊知憶弟望遠勝登樓
處處題詩編篇篇誰爲收

次韻子瞻南溪避世堂

柱杖行窮徑

有林飛禽不驚處萬竹正當心
虎嘯風吹籟

霜多蟬病瘖獸驕從不避
人到記由今未暇終身住
聊爲半日吟青松可絕食
黃葉不須衾偶到初迷路
將還始覺深堂中有幽士
插髻尙餘簪

和子瞻三遊南山九首

樓觀次韻

神仙避世守關門
一世沉埋百世尊
舊宅居人無姓尹
深山道士卽爲孫
天寒遊客常逢雪
日暮歸鴉自識村
君欲畱身記幽寂
直將山外比羌渾

五郡次韻

蜀人不信秦川好
食蔗從梢未及甘
當道沙塵類河北
依山水竹似江南
觀形隨阜飲溪鹿
雲氣侵山食葉蠶
猶有道人迎客笑
白鬚黃袖豈非聃

傳經臺

輪扁不能令子巧老聃雖智若爲傳遺經尙在臺如故弟子今無似喜賢

大秦寺

大秦遙可說高處見秦川草木埋深谷牛羊散晚田山平堪種麥僧魯不求禪北望長安市高城遠似烟

仙遊潭五首

潭深不可涉潭小不通船路斷遊人止龍藏白沫旋剪藤量水短插石置橋堅橋外居民少躬耕不用錢

右潭

澄潭下無底將渡又安能慣上橫空木輕生此寺僧曉魚聞考考石塔見層層不到殊非惡他年記未曾

右南寺

君看潭北寺何用減潭南不到還能止重來獨未厭荒涼增客思貧病覺僧慙飲水寒難忍誰言栢子甘

右北寺

扶風貴公子早歲伴山家吹笛墮秋葉讀書隨曉鴉業成心白叛學苦我長嗟石室非人住窮山雪似沙

右馬融石室

洞門蒼蘚合偈仄不容身傳有虛明處中藏窈窕人吹笙橋上月
拾翠洞南春往往來山下蕭然雨洒塵

右玉女洞

和子瞻調水符

子瞻令人取玉女洞水恐其見欺破竹爲契使寺僧藏其以爲往來之信故云

多防出多欲欲少防自簡君看山中人老死竟誰謾渴飲吾井泉
飢食甌中飮何用費卒徒取水負瓢饋置符未免欺反覆慮多變
授君無憂符階下泉可嚙

次韻子瞻招隱亭

隱居吾未暇何暇勸夫人試飲此亭酒自慙纓上塵林深開翠帟
岸斷峻嚴闌送雪村酤醞迎陽鳥呀新竹風吹斷籟湖月轉車輪
霜葉飛投坐山梅重壓巾欲居常有待已失歎無因古語君看取
聲名本實賓

次韻子瞻凌虛臺

棄我謂我遠求我謂我還我一爾則二視此臺上山山高上千天
獨不照我顏無乃我自蔽誰謂山則慳遠望不見趾近視不得鬢
山實未始變任子自擇刪北風吹南崖山上秋葉斑道遠又寒芒
皴裂辭難攀晴空卷朝雲照夜霜月彎強爾登此臺免爾超闐闐

扶風太守宅舊不見南山唯此臺上見之故云

次韻子瞻竹飢

野食不穿困谿飲不盜益嗟飢獨何罪膏血自爲罔陰陽造百物
偏此愚不爽肥癯與瘦黠稟受不相髣王孫處深谷小若兒在襁
超騰避彈射將中還復枉一朝受羈縲冠帶相賓饗愚死智亦擒
臨食抵吾掌

次韻子瞻漢陂魚

漢陂霜落魚可掩枯芡破盤蒲折劍巨斧敲冰已暗知長叉刺浪
那容閃鯨孫蛟子誰復惜朱鬣金鱗漫如染邂逅相遭已失津偶
然一掉猶思塹嗟君遊宦久羊豕有似遠行安野店得魚未熟口
流涎豈有哀矜自欺僭人生飽足百事已美味那令一朝欠少年
勿笑貪匕飭老病行看費鍼砭羊生懸骨空自飢伯夷食菜有不
贍清名驚世不益身何異飲醢徒酷醢

和子瞻讀道藏

道書世多有吾讀老與莊老莊已云多何況其駢傍所讀嗟甚少
所得半已強有言至無言旣得旋自忘譬如飲醇酒已醉安用漿
昔者惠子死莊子哭自傷微言不復知言之使誰聽哭已輒復笑
不如斂此藏脂牛雜肥荇烹熟有不嘗安得西飛鴻送弟以與兄

次韻子瞻南溪微雪

南溪夜雪曉來霽有客晨遊酒未消風泛餘花來逐馬光浮斷澗
不知橋山寒凍合行人息醉熟賓歡舞意囂歸騎相將踏瑤玉嗅
林閑認早梅條

和子瞻司竹監燒葦園因獵園下

駿馬七尺行馮馮曉出射獸霜爲冰荻園斫盡有枯枿束茅吹火
初如燈乍分乍合勢開展蒼烟被野風騰騰黃狐驚顧嘯儔侶飛
鳥先起如蒼蠅須臾立旆布行伍有似脩蟒橫岡陵蒼鷹猛獸出
前後缺處已挂黃麻罨回風忽作火力怒平地一卷無疆勝商辛

不出抱寶死曹瞞逸去燠其肱投身誤喜脫灰燼闖首旋已遭侵
凌何人上馬氣吞虎狐帽壓耳皮蒙膺開弓徐射疊雙兔擁馬驩
叫驚未曾舉鞭一麾百夫進擊鼓再發箭舉棚去如飛螭中如電
獲若雨獸膏流澠肉分麾下飽壯士皮與公子畱縑繪縱橫分裂
惠村塢尚有磊落載後乘吾兄善射久無敵是日斂手稱不能憑
鞍縱馬聊自適酒後醉語誰能磨健兒擊搏信可樂主將雄猛今
誰勝胸中森列萬貔虎嗟世但以文儒稱安得強弓傳長箭使射
蔽日垂天鵬

木山引水二首

引水穿牆接竹梢
谷藏峯底大容瓢
將流旋滴廬山瀑
已盡還來海上潮
亂點落池驚睡覺
半山名潤沃心焦
瓦盆一斛何勝溢
去猶能浸菊苗

簷下枯槎拂荻梢
山川迤邐費公瓢
幽泉細細流巖鼻
盆水瀾瀾漲海潮
但愛堅如湖上石
誰憐收白竈中焦
蒼崖寒溜須佳蔭
少冬青青石甌苗

興州新開古東池

山遶興州萬疊青
池開近郭百泉并
昔年種柳人安在
累歲開花藕自生
波暖跳魚聞樂喜
人來野鴨望船鳴
西還過此須終日
爲

問使君行未行

子瞻喜雨亭北隋仁壽宮中怪石

仁壽宮中穠穀生
太湖蒼石草間橫
興衰換世身猶在
南北從人事已輕
累石作臺秋蘚上
鑿泝通水細渠清
三年此亦非公有
空使他年記姓名

用林妣韻賦雪

密雪來何晚窮冬
候欲差投空落細
米布地淨平沙繚
繞飛相著重仍積
暗加雨微花破碎
風細腳傾斜次第
來如摻冥濛墮不
譁燁鵝吹勁韜秀
葦拂輕耒畫字飄
還沒團毬暖旋窰
出鹽東海若

鍊石古皇媧翻簸騰歸騎紛飄集晚鴉庭梅辨紅萼隴麥覆黃芽
撥砌求新藥尋蹤射伏麕埋樓不盡春集樹短畱槎亂下曾何擇
平鋪欲盡遮欺貧寒入褐惱客重添車積素聊成燭烹甘強試茶
病僧添曉鉢老令放晨衙融液曾何有鮮明竟不奢積多還避井
化早發從畚溜滴簷垂箸行觀逕轉地誰能相就醉都市酒容賒

送張唐英監閩州稅

閩中雖近蜀監稅本閑官豈足淹賢俊聊應長羽翰讀書心健不
答策意何闕未可厭畋獵田中有走狙

送張師道楊壽祺二同年

故國多賢俊登科並弟兄重來舊游處兩見近題名冉冉須堪把
駸駸歲可驚孤轅已南向疋馬復西征入峽猿應苦還荆鴈已鳴
喜從元帥幕官職漸崢嶸

送家定國同年赴永康掾

清慎岷山掾登科已七年迎親就魚稻爲吏擇林泉去騎關中熱
歸心沫水鮮官閑幸可樂記買鷓鴣煎永康多鷓鴣

送霸州司理翟曼

大梁能賦客邊郡繫囚曹官職不相稱聲名終自高試觀爲吏苦
應過讀書勞努力事初宦尺絲無厭縑

送道士楊見素南遊

黃河春漲入隋溝，往意隨波日夜流。
萬里尋山如野鶴，一身浮水似輕鷗。
湖風送客那論驛，嶽寺留人暗度秋。
遲子北歸來見我，攜琴委曲記深幽。

利路提刑亡伯郎中挽詞二首

好學先鄉黨，登科復妙年。
誰為耆舊傳，最處縉紳先。
淪謝今亡矣，風流孰繼焉。
魂歸食里社，世世仰仁賢。

其二

晚歲官仍困，終身恥自言。
廉明漢循吏，仁愛鄭公孫。
赤縣朝稱理

衡山德共尊，遠人應罷市。
處處有遺恩。

伯母同安縣君楊氏挽詞

德盛諸楊族，賢宜伯父家。
周姜職蘋藻，歆母事桑麻。
大邑移封近，陰堂去日賒。
空餘鏡奩在，時出舊笄珈。

樂城集卷之二終

樂城集卷之三

宋西蜀蘇轍子由著

明東吳王執禮子敬
顧天敘禮初全校

詩七十五首

北京送孫曼叔屯田權三司開坼司

人生不願才才士困奔走君為大農屬求暇更能否自我遊魏博
相識恨未久誰言但傾蓋信有勝白首清晨坐風觀落日語涼曠
慕精動如律弓健不論斗旁觀我不能晤語君見受秋風起沙漠
淒雨濕征袖送行欲汲汲富貴恐君後將去聊遲遲已遠悲朋友

和強至太博小飲

誰能飲酒如傾水醉倒坐中扶不起形骸外物已如遺升斗任君
無復避霜梨冰脆寒侵齒未盡一杯先已醉強將文字笑紅裙冷
淡爲歡何足貴

和強君瓦亭

君爲魏博三年客日有江湖萬里心
斲得野亭畱馬足強循疎柳
步堤陰無人攜手共吳語得意搖頭時越吟何日東郊過微雨竝
騎鞍馬去同尋

中秋夜八絕

得月明星稀
鳥鵲南飛

長空開積雨清夜流明月看盡上樓人油然就西沒誰遣常時月
偏從此夜明暗添珠百倍潛感兔多生欲見初容燭將升尚有星
漸高圍漸小雲外轉亭亭明入庭陰白寒侵酒氣微夜深看更好
樓上漸人稀浮光看不定重露試還無影翻狂舞客明誤已棲鳥
巧轉上人衣徐行度樓角河漢冷無雲冥冥獨飛鵲猿狖號枯木
魚龍泣夜潭行人已天北思婦隔江南看久須扶立行貪遂失歸
誰能終不睡爛醉羽觴飛

次韻王君貺尙書會六同年

有美佳賓賢主人布衣曾共脫京塵歡來未覺歲華晚醉後能令

秋氣春發譽早同
初宦日收功終藉老
成身他年此會應
圖畫傳入誰家屏障新

王公生日

純陰十月晚勁氣蕭羣驕
惟有喬松在長看積雪消
生賢稟真性特立冠當朝
早歲初成賦羣雄已失標
治才精破竹廷論壯生飈
博士皆推賈宣皇重試蕭
周旋窮政體出入解心焦
九列高稱冠三台豈足超
論功歸類霸舉相待虞姚
驥騁經新臥弓強發久昭
百年時節在四海眾心翹
當見飛中使齎金賜此朝

三府生日
例賜金帛

次韻姚孝孫判官見還岐梁唱和詩集

伯氏文章豈敢知
岐梁偶有往還詩
自憐兄力能兼弟
誰肯墳終不聽篋西
號春游池百頃南溪
秋入竹千枝恨君曾
是關中吏屬和追陪
失此時

次韻王臨太博馬上

冬晚霜露重城遙
鞍馬勞徒知事奔走
曾未補毫毛水旱嗟
頻蹙瘡痍費抑搔
莫歸何暇食堆按簿
書高

次韻王君北都偶成三首

河轉金隄近天高
魏闕新千夫奉儒將
百獸伏麒麟校獵沙
場莫談兵玉帳春關
南知不遠誰試問蕃
隣

其二

天寶亂已定河壖兵更多故城埋白骨遺俗喜長戈臥獸常思肉
奔鯨不受羅縱橫竟安在唯見冢嵯峨

其三

禁禦封金殿清河貫石門時平餘古木兵散有空屯形勝山圍關
蕃宣海內尊川原不論頃雲夢可勝吞

次韻沈立少卿白鹿

白鹿何年養驚猜未肯馴軒除非本性飲食強依人照影冰浮水
飛毛雪灑塵獨游應已倦忽見乍疑神野色明幽步烟蕪薦臥身
異姿人共愛清意爾誰親日暖山苗熟風微澗草春何緣解韁繫
奔放任天真

送陽安期都官出城馬上

城中二月不知春唯有東風滿面塵歸意已隨行客去流年驚見
柳條新簿書填委林何日學問榛蕪愧古人一頃稻田三畝竹故
園何負不收身

登上水關

淇水泐泐入禁城城樓中斷過深清空郊南數牛羊下落日迴瞻
觀闕明歲月逼人行老大江湖發興感平生畫舫早晚籠新屋慰

意來看水面平

寒食贈遊壓沙諸君

城南壓沙古河淤沙上種梨千萬株隆冬十月我獨往風吹葉盡
枝條疎老僧屈指數春候却後百日花當蘇微風細雨膏潤足枝
頭萬萬排明珠齊開競發不知數照曜冰雪明村墟此時官閑得
遊賞長堤平穩宜驂駒寺門石木芽葉動倉庚布穀相和呼及時
行樂不可緩歲長春短花須臾僧言我意兩相值欲往屢已脂吾
車今朝寒食烟火斷薄雲蔽日風沙除此花久已待我至况有朋
友相攜扶來邀反覆不能往豈獨負君花已辜諸君高邁足才思
佐酒况得萬玉奴坐中未醉慎無起倒戴當使山公如

明日安厚卿強幾聖復召飲醉次前韻

芳樽酌水清無淤梨園著雪迷根株鄰官士女喜行樂坐上醉客
誰親疎倦遊不知歲月過痛飲漸覺筋骸蘇風吹落片亂鶯毳雨
結細實駢明珠雲屯冰積動論頃誰信城郭涵村墟坐觀明媚低
照席行看繁鬧橫遮駒我貧不辦供酒炙側耳日聽交朋呼無端
人事巧拘束會不見置閑須臾長鯨渴水求入海老驥伏櫪思就
車清明未過春未老寒食豈必節與除二君爲我重置酒席上醉
倒交相扶歡娛安用苦酬酢叫嘯不畏相罪辜昏然已覺萬物小

下視吏役真婢奴請君數具牛酒費此外百事何能如

次韻柳子玉郎中見寄

新年始是識君初顧我塵埃正滿裾談辯未容朝夕聽情親空愧
往還書久聞筆陣無前敵更擬詩壇託後車待得入城應少暇相
從有約定何如

秀州僧本瑩淨照堂

有僧訪我攜詩卷自說初成淨照堂求得篇章書壁素不論塵土
漬衣黃故山別後成新歲歸夢春來遶舊房看取盈編定何益客
來無語但循牆

京師送王願殿丞

憶遊長安城皆飲母卿宅身雖坐上賓心是道路客笑言安能久
車馬就奔迫城南南山近勝絕聞自昔徘徊竟莫往指點煩鞭策
道傍古龍池深透河渭澤山行吾不能愧此纔咫尺壯哉誰開鑿
千頃如一席參差山麓近澆蕩波光射君時在池上俗事厭紛劇
望門不敢叩恐笑塵土迹自從旅京城所向愈無適君來曾未幾
已復向南國扁舟出淮汴唯見江海碧野人處城市長願有羽翮
脫身相從遊未果聊自責

石蒼舒醉墨堂

石君得書法弄筆歲月久經營妙在心舒卷功隨手惟茲逸羣氣
扶駕須斗酒作堂名醉墨揮灑動牆牖安得濁酒池淋漓看濡首
但取繼張君莫顧顛名醜

遊淨因院寄璉禪師

歲月潛消日裏冰依然來見佛堂燈此身已自非前我問法何妨
似舊僧灑面飛泉時點點壓池蒼石尚層層遙知近愛金山好江
水煎茶日幾升

送柳子玉

柳侯白首郎風格終近古舊游日零落新輩誰與伍人情逐時好

變化無定主試看近時人相教蹈規矩行身劇孔孟稱道皆舜禹
但求免譏評豈顧愁肺脯坐令不羈士舉足遭網罟緬懷我生初
遺俗尚目睹中庸雖已亡比近則猶愈老成慎趨好後生守淳魯
豈效相謾欺術牛沽馬脯過惡酒色間可罪非可惡譬如稽與阮
心迹豈深蠹京師逢柳侯往事能歷數歎息子美賢相與實舊故
至今存篇章醉墨龍蛇舞斯人今苟在亦恐終囚虜惜哉時論隘
安置失處所一麾寄河壩垂老幸有土世俗安足論且盡杯中醕

送蘇公佐修撰知梓州

乘輅舊西蜀出鎮復東川父老知遺愛壺漿定滿前江山昔年路

旄節異邦權望重
朝中舊疆分劍外
天歲登無猛政蠻
服罷防邊去國身
雖樂憂時論獨堅
孤誠抱松直彙進
比茅連我亦相從
逝疎狂且自全

送任師中通判黃州

一別都門今五年
劇談精壯故依然
厭居巴蜀千山底
決住荆河十頃田
老去功名無意取
身閑詩筆更能專
黃州無事聊須飲
世俗方今自足賢

南窗

京師三日雪
雪盡泥方深
閉門謝還往
不聞車馬音
西齋書帙亂

南窗初日升旗轉
守床榻欲起復不能
開戶失瓊玉滿堦
松竹陰客從遠方來
疑我何苦心疎拙
自當爾有酒聊共斟

次韻楊襄直講攬鏡

鬢髮年來日向衰
相寬不用強裁詩
壯心付與東流去
霜蟹何妨左手持
花發黃鸝巧言語
池開楊柳鬪腰肢
勸君行樂還聽否
卽是南風苦熱時

送錢婺州純老

桃花汴水半河流
已作南行第一舟
倦報朝中言嘖亂
喜聞淮上檣咿
咿平時答策詞
無枉此去爲邦學
更優自古東陽足
賢守請

君重賦沈公樓

次韻柳子玉見贈

壯心衰盡愧當年刻意爲文日幾千老去讀書聊度歲春來多睡
苦便羶夢歸似鴈長飛去才短如蠶只自纏唯有聞詩尙思和可
能時寄最高篇

次韻任遵聖見寄

故國老成誰復先壯心空記語當年灌夫失意貧無友梅福辭官
晚作仙詩句清新非世俗退居安穩卜江天它年我亦從君隱多
買黃魚煮復煎

次韻劉貢甫學士畫松石圖歌

長松大石生長見竭遊塵土嗟空羨寒翠關心失舊交榮華過眼
驚流電破繪買得古畫圖遺墨參差隨斷線膠枝倒掛風自舞直
榦孤生看面面故山舊物遠莫致愛此隨人共流轉物生眞僞竟
何有適意一時寧後辨少年所好老成癖傍人指笑嗟矜衒京城
宅舍松石希買費百金猶恐賤

送頤起及第還蔡州

詔書京輔起沉淪歲貢仍居第一人不愧得官名暫屈自誇對策
語深淳讀書飽足終無厭從宦奔馳自此新我去淮陽今不久鄰

邦時得問音塵

初到陳州二首

謀拙身無向歸田久未成來陳爲懶計傳道愧虛名俎豆終難合
詩書強欲明斯文吾已試深恐誤諸生

其二

久愛閑居樂茲行恐遂不上官容
綠碌飽食更悠悠枕畔書成
湖邊柳散愁疎慵愧韓子文字化潮州

柳湖感物

柳湖萬柳作雲屯種時亂插不須根根如臥虵身合抱仰視不見
蜩蟬喧開花三月亂飛雪過牆度水無復還窮高極遠風力盡棄
墜泥土顏色昏偶然直墮湖中水化爲浮萍輕且繁隨波上下去
無定物性不改天使然南山老松長百尺根入石底蛟龍蟠秋深
葉上露如雨傾流入土明珠圓乘春發生葉短短根大如指長而
堅神農嘗藥最上品氣力直壓鍾乳溫物生稟受久已異世俗何
始分愚賢嘗見野人言柳花八水爲浮萍松上露墮地爲仙茅
陰乾服之益人古方云十斤鐘乳不如一斤仙茅
柳湖久無水悵然成詠

平湖水盡起黃埃惟有長堤萬萬栽病鶴摧頽沙上舞游人寂寞
岸邊回秋風草木初搖落日暮樵蘇自往來更試明年春絮起共

看飛雪亂成堆

次韻孫戶曹朴柳湖

疎慵非敢獨違時野性顛狂不受羈猶有曲湖容笑傲誰言與物
苦參差水乾生草曾非惡鶴舞因風忽自怡最愛柳陰遲日暖幅
巾輕履肯相隨

贈李簡夫司封

平生談笑接諸公歸老身心著苦空往事少能陪晤語新詩時喜
挹清風形骸摩詰羸偏健筆札西臺晚更工笑我壯年常苦病異
時何以作衰翁

次韻李簡夫秋園

秋色豈相負小園仍有花遶欄吟落日拾徑得殘葩菊細初藏蝶
桐疎不庇鴉遊觀須作意霜雪僅留槎

題李簡夫葆光亭

遙草侵芒屨庭花墮石臺小亭幽事足野色向人來坐上烏皮几
牆間大瓠壘老成無不可談笑得徘徊

次韻李簡夫因病不出

十五年來一味閑近來推病更安眠鶴形自瘦非關老僧定端居
不計年坐上要須長滿客杖頭何用出攜錢未嫌語笑妨清靜閑

暇陪公几杖前

張安道尙書生日

出入三朝望愈尊
淮陽退臥避喧
頌崇高歷徧知
皆妄風俗頻遷
氣獨存世事直
須勞舊德歸心
那復厭名藩
赤松作伴功雖切
白髮憂時義所敦
仁比高山年自倍
秋逢生日喜盈門
知公知命身無禱
聊爲生靈舉壽樽

送劉道原學士歸南康

大川傾流萬物俱
根旋脚脫爭奔徂
流萍斷梗誰復數
長林巨石會須臾
軒昂顛倒唯恐後
嗟子何獨強根株
三年一語未嘗屈
擬學文舉驚當塗
心知勢力非汝敵
獨恐清議無遺餘
扁舟歲晚告歸覲
家膳欲及羞尊鱸
隱居高節世所尙
掛冠早歲還州閭
紛紜世事不著耳
得失豈復分錙銖
投身固已陷泥滓
獨立未免遭霜濡
君歸左右識高趣
牛毛細數分賢愚

題滑州畫舫齋贈李公擇學士

牕戶重重向日明
船居氣味此中生
汀洲出沒叢花短
波浪澄虛兩岸平
竄逐南來身未穩
安閑感物意猶驚
前賢事迹君今似
不愧當年畫舫名

歐陽公南遷佐是邦而爲此齋公擇之謫亦從南來故云

送王恪郎中知襄州

魏公德業冠當年汝守威名竦漢邊將相傳家俱未遠子孫到處
各推賢風流最喜君真似符竹連分政得專峴首重尋碑墮淚習
池還指客橫鞭逃江已覺依劉表寒俊應須禮浩然當有郡人知
古意欄街齊唱接籬篇

和張安道讀杜集用其韻

我公才不世晚歲道尤高與物都無著看書未覺勞微言精老易
奇韻喜莊騷杜叟詩篇在唐人氣力豪近時無沈宋前輩蔑劉曹
天驥精神穩層臺結構牢龍騰非有迹鯨轉自生濤浩蕩來何極
雍容去若遨壇高真命將鬣亂始知髦白也空無敵微之豈少褒

論文開錦繡賦命委蓬蒿初試中書日旋聞廊時逃妻孥隔豺虎
關輔暗旌旄入蜀營三徑浮江寄一艘投入慙下舍愛酒類東臯
漂泊終浮梗迂疎獨釣鼈誤身空有賦揜脛惜無袍卷軸今何益
零丁昔未遭相如元竝世惠子謾臨濠得失將誰怨憑公付濁醪

送張公安道南都留臺

識公歲已深從公非一日仰公如重雲庇我貧賤迹公歸無留意
我處念平昔少年喜文字東行始觀國成都多遊士投謁密如櫛
紛然眾人中顧我好顏色猖狂感一遇邂逅登仕籍爾來十六年
鬢髮就衰白謀身日已謬處世復何益從來學俎豆漸老信典冊

自知百不堪偶未三見黜譬如溝中斷誰復強收拾高懷絕塵土
舊好等金石庠齋幸無事樽俎奉清適居然遠憂患况復取矜式
汪洋際海深淡泊朱弦直狗時非所安歸去亦何失道存尚可卷
功成古難必還尋赤松子獨就丹砂術恨無二頃田伴公老蓬壺

傅欽之學士濟源草堂

聞有高居直百金西山南麓北山陰園通濟水池塘好花近洛川
顏色深人去節旄分重鎮客來猿鶴感幽吟濕溪雨過西湖漲歸

興蕭然定不任

欽之時
在許州

文與可學士墨君堂

虛堂竹叢閒那復厭竹遠風庭響交夏月牖散凌亂尙恐晝掩關
嬋娟不長見中堂開素壁蕭颯起霜餘隨宜賦生意落筆皆葱蒨
根莖雜土石枝葉互長短依依露下綠冉冉風中展闢門視叢薄
與此終何辨

故成都尹陸介夫挽詞

擁節西南未一年淒涼道路泣東轅蜀都富樂真當惜民事艱難
誰復論白馬何人趨遠日青芻盈束更無言異時歸去逢遺老空
聽咨嗟述舊恩

次韻柳子玉謫官壽春舟過宛邱見寄二首

局冷會非簿領迷幽居渾似未官時忽聞客至驚還喜出見泥深
笑不知謀拙未能憂歲計身閑聊可飽晨炊行舟借問何忽草淮
口無潮月正虧
獻酬不用辭升斗曲直何勞問尺尋要路風波無限惡謫居情味
最能深交從錦水初無間鄰卜共山已有心草聖詩豪並神速數
因南鴈惠佳音

次韻子瞻穎州留別二首

託身遊宦鄉終老羨箕穎隱居亦何樂親愛形隨影念兄適吳越
霜降水初冷翩然事舟楫棄此室廬靜平明知當發中夜抱虛警

永懷江上宅歸計失不猛人生狗所役有若魚墜井遠行豈易還
劇飲終難醒不如早自乞閑日庶猶永世事非所憂多憂亦誰省

其二

放舟清淮上蕩滸洗心胸所遇日轉勝恨我不得同江淮忽中斷
陂埭何重重紫蟹三寸筐白鳧五尺童赤鯉寒在汕紅粳滿霜風
西成百物賤加飡慰貧窮胡爲復相念未肯安南東人生免飢寒
不受外物攻不見田野人四壁編茅蓬有食輒自樂誰知富家翁

陪歐陽少師永叔燕穎州西湖

西湖草木公所種仁人實使甘棠重歸來築室傍湖東勝遊還與

邦人共公年未老髮先衰對酒清歡似昔時功成業就了無事令
名付與他人知平生著書今絕筆閉門燕居未嘗出忽來湖上尋
舊遊坐令湖水生顏色酒行樂作遊人多爭觀竊語誰能呵十年
思穎今在穎不飲耐此遊人何

歐陽公所蓄石屏

石中枯木雙扶疎粲然脈理通肌膚剖開左右兩相屬細看不見
毫髮殊老樗剝落但存骨病松憔悴空留鬚邛陵迤邐山麓近雲
烟澹霽風雨餘我驚造物巧如此刻畫瑣細供人須公家此類尙
非一客至不識空嗟吁案頭紫雲抱明月床上寒木翻飢鳥賦形

簡易神自足鄙棄筆墨嗟勤劬天工此意與人競雜出變怪驚羣

愚世間淺拙無與敵比擬賴有公新書

月石硯屏及石上寒林樓烏皆公詩所賦

次韻子瞻初出穎口見淮山

清淮此日見滄浪始覺南來道路長
牕轉山光時隱見船知水力故軒昂
白魚受釣收寒玉赤稻堆場列遠岡
波浪連天東近海乘桴直恐漸茫茫

次韻子瞻壽州城東龍潭

東行取次閱三州擊鼓清晨復解舟
車騎紛紜追過客歌中淒咽動潛虬
宦遊底處非巢燕歸計何嫌誚沐猴
賴有故人憐遠適慙

勸屢勸酒行周

和子瞻渦口遇風

長淮暮生風來自渦河口
新舟雖云固波浪亦難受
詩來話艱厄驚恐及見婦憶河
流荆峽終夜愁石首餘飈入
幃幄跳沫濺窗牖平生未省見
驚顧欲狂走爾來涉憂患漸覺成
老醜遙喜波浪中時能飲醇酒

和子瞻濠州七絕

塗山

娶婦山中不肯畱會朝山下萬諸侯
古人辛苦今誰信只見清淮

入流海

彭祖廟

長說先師似老彭共疑好學古書生
不知亦解食雲母白日登天

萬事輕

山有雲母云
彭祖所採服

逍遙堂

莊周墓上
祠堂也

猖狂戰國古神仙曳尾泥塗老更安
厭世乘雲人不見空墳聊復

葬衣冠

觀魚臺

莊子談空惠子聽郢人斤斧
竦忘形莫嗟質喪無知者對石何妨

自說經

虞姬墓

布叛增亡國已空摧殘羽翮自令窮艱難獨與虞姬共誰使西來
敵沛公

四望亭

大和中郡守劉嗣之立
李紳爲之記今亭廢矣

唐史不聞劉嗣之空傳短李舊歌詩高亭毀盡唯存記猶有區區

父老知

浮山洞

洞在淮上夏潦不能及而
冬不加高故人疑其浮也

洞府元依水面開秋潮每到洞門回幽人燕坐門前石長看長淮

舟去來

和子瞻泗州僧伽塔


清淮濁汴爭強雄龜山下闕支祁宮高秋水來無遠近蕩滅洲渚
乘城墉千艘銜尾誰復惜萬人雨泣哀將窮城中古塔高百尺下
有蛻骨黃金容蛟龍百怪不敢近迴風倒浪歸無蹤越商胡賈豈
知道脫身獻寶酬元功至人已立萬物表劫火僅置毛孔中區區
淮汴亦何有一挹可注滄溟東胡爲尙與水族較時出變怪驚鼎
鼐於乎此意不可詰仰觀飛棋凌晴空

次韻子瞻發洪澤遇大風却還宿


昨夜宿鴻澤再來遂如歸卻行雖云拙乘險諒亦非誰言淮陰近
阻此駭浪飛長風徑千里蛟蜃相因依眇然恃一葉此勢安可違
冒涉彼何人勇決生慮微欲速有不達魚腹豈足肥風帆尚可轉
野廟誰能祈但當擁衾睡慎閉牕與扉夜間聲尙惡起視聊披衣

次韻子瞻記十月十六日所見

君不見天高后土黃變化出入唯陰陽旋凝細霧作飛雹復遣震
雷追日光可憐萬物甚微細坐聽百變隨顛僵深根固蒂無計遯
倏來忽返安能防平生未見實驚耳稍遠不知如隔牆君看歌舞
醉華屋下有纍繫排兩廊眼前苦樂回懸絕空中造化知有亡我
居宛邛厭凝沍雪翻海水填陂塘但知膏澤利牟麥恣食麩餌眞
嘉祥山陽所記亦何事有酒胡不盡一觴



樂城集卷三終



70025396

